

VENDIM
Nr. 22, datë 1.2.2019

**PËR DISA SHTESA DHE NDRYSHIME NË UDHËZIMIN NR. 2, DATË 29.1.2013, “PËR
CAKTIMIN E RREGULLAVE PËR DEPOZITIMIN DHE VERIFIKIMIN E
DOKUMENTACIONIT TË KANDIDIMIT DHE AFATET PËR PUBLIKIMIN E
LISTAVE TË KANDIDATËVE”**

Komisioni Qendror i Zgjedhjeve, në mbledhjen e tij të datës 1.2.2019, me pjesëmarrjen e:

Klement	Zguri	kryetar;
Denar	Biba	zv/kryetar;
Bledar	Skënderi	anëtar;
Edlira	Jorgaqi	anëtare;
Rezarta	Bitri	anëtare,

shqyrtoi çështjen me:

OBJEKT: Për disa shtesa dhe ndryshime në udhëzimin nr. 2, datë 29.1.2013, “Për caktimin e rregullave për depozitimin dhe verifikimin e dokumentacionit të kandidimit dhe afatet për publikimin e listave të kandidatëve”.

BAZA LIGJORE: Neni 21, pika 1, neni 23, pika 1, germa “a”, 73, pika 6, të ligjit nr. 10019, datë 29.12.2008, “Kodi Zgjedhor i Republikës së Shqipërisë”, i ndryshuar.

Komisioni Qendror i Zgjedhjeve, pasi shqyrtoi dokumentacionin e paraqitur, si dhe dëgjoi diskutimet e përfaqësuesve të partive politike,

VËREN:

Në nenin 67, nenin 68, nenin 69, nenin 71, nenin 72 dhe nenin 73, të ligjit nr. 10019, datë 29.12.2008, “Kodi Zgjedhor i Republikës së Shqipërisë”, i ndryshuar, parashikohen procedurat për depozitimin, verifikimin dhe miratimin e listave shumëmbrore të subjekteve zgjedhore dhe dokumentacionit të regjistrimit të kandidatëve, në Komisionin Qendror të Zgjedhjeve dhe Komisionet e Zonave të Administrimit Zgjedhor (KZAZ), si dhe përcaktimin e afateve për publikimin e listave të kandidatëve, për zgjedhjet për kryetar bashkie dhe anëtar Këshilli Bashkiak.

Neni 73, pika 6 e ligjit detyron Komisionin Qendror të Zgjedhjeve, për të përcaktuar me akt normativ rregullat për verifikimin e dokumentacionit të kandidimit dhe afatet për publikimin e listave.

Për përmbushjen e detyrimeve ligjore që rrjedhin nga dispozitat e sipërcituara, Komisioni Qendror i Zgjedhjeve, ka miratuar udhëzimin nr. 2, datë 29.1.2013 “Për caktimin e rregullave për depozitimin dhe verifikimin e dokumentacionit të kandidimit dhe afatet për publikimin e listave të kandidatëve”.

Referuar nenit 23, pika 4, të Kodit Zgjedhor, aktet normative të Komisionit Qendror të Zgjedhjeve, kanë karakter të përhershëm dhe zbatohen si rregull për të gjitha llojet e zgjedhjeve. Këto akte rishikohen në rast të ndryshimit të ligjit apo për shkaqe të tjera që përlligjin ndryshimin e tyre.

Kuvendi i Shqipërisë, me ligjin nr. 138/2015, “Për garantimin e integritetit të personave që zgjidhen, emërohen ose ushtrojnë funksione publike” dhe vendimit të Kuvendit nr. 17/2016, “Për përcaktimin e rregullave të detajuara mbi zbatimin e ndalimeve të parashikuara në ligjin nr. 138/2015”, ka përcaktuar detyrimin e çdo kandidati përpara regjistrimit të tyre si të tillë, për depozitimin në Komisionin Qendror të Zgjedhjeve të formularit të vetëdeklarimit.

Neni 67 i Kodit Zgjedhor përcakton se kandidatët për kryetar bashkie dhe lista e kandidatëve për këshillat vendorë regjistrohen në KZAZ, ndërsa për territoret që nuk mbulohen nga një KZAZ e vetme, regjistrohen në KQZ. Nga ana tjetër, neni 5, pikat 2 dhe 4, të ligjit nr. 138/2015, “Për garantimin e integritetit të personave që zgjidhen, emërohen ose ushtrojnë funksione publike”, sanksionon se formulari i vetëdeklarimit dorëzohet dhe administrohet pranë Komisionit Qendror të Zgjedhjeve për të

zgjedhurit dhe kandidatët për deputetë në Kuvendin e Shqipërisë apo në organet e qeverisjes vendore. Refuzimi për të dorëzuar formularin e vetëdeklarimit ose mosparaqitja e tij përbën shkak për mosregjistrimin e kandidatit në zgjedhje nga Komisioni Qendror i Zgjedhjeve.

Në referim të dispozitave të Kodit Zgjedhor, dokumentacioni i kandidimit për kandidatët për kryetar bashkie, kandidatët e listave shumemërore të këshillave bashkiakë dhe kandidatët e propozuar nga zgjedhësit, për 51 bashki të cilat administrohen nga një KZAZ, do të depozitohet në KZAZ. Në referim të ligjit nr. 138/2015, “Për garantimin e integritetit të personave që zgjidhen, emërohen ose ushtrojnë funksione publike”, formulari i vetëdeklarimit për secilin kandidat duhet të depozitohet në Komisionin Qendror të Zgjedhjeve.

Për sa më lart, në udhëzimin nr. 2, datë 29.1.2013, “Për caktimin e rregullave për depozitimin dhe verifikimin e dokumentacionit të kandidimit dhe afatet për publikimin e listave të kandidatëve”, lind e nevojshme që të bëhen ndryshimet në disa nene të këtij udhëzimi, me qëllim përcaktimin e procedurave që do të ndjekë KQZ-ja, në zbatim të ligjit nr. 138/2015, “Për garantimin e integritetit të personave që zgjidhen, emërohen ose ushtrojnë funksione publike” dhe KZAZ-ja, në zbatim të Kodit Zgjedhor dhe bashkëveprimin e tyre në funksion të regjistrimit përfundimtar të kandidatëve.

PËR KËTO ARSYE,

Komisioni Qendror i Zgjedhjeve, bazuar në nenin 23, pika 1, germa “a”, pikat 2, 4 dhe 5, të ligjit nr. 10019, datë 29.12.2008, “Kodi Zgjedhor i Republikës së Shqipërisë”, i ndryshuar,

VENDOSI:

1. Në udhëzimin nr. 2, datë 29.1.2013, bëhen këto shtesa dhe ndryshime:

1.1 Neni 8/1 ndryshohet si më poshtë:

“Neni 8/1

Formulari i vetëdeklarimit

1. Për kandidatët për deputet, në zgjedhjet për Kuvendin e Shqipërisë, kandidatët për kryetar bashkie dhe kandidatët për anëtarë në këshillat bashkiakë në zgjedhjet për organet e qeverisjes vendore, partia politike depoziton në Komisionin Qendror të Zgjedhjeve, përveç dokumentacionit të përcaktuar në këtë udhëzim, formularin e vetëdeklarimit sipas modelit të miratuar në kreun III, pika 5, të vendimit nr. 17/2016 të Kuvendit, “Për përcaktimin e rregullave të detajuara mbi zbatimin e ndalimeve të parashikuara në ligjin nr. 138/2015”. Për kandidatët e propozuar nga zgjedhësit, formulari i vetëdeklarimit dorëzohet në KQZ nga Komiteti Nismëtar ose nga kandidati.

2. Në zgjedhjet për organet e qeverisjes vendore, së bashku me formularët e vetëdeklarimit, partia politike/subjekti zgjedhor, dorëzon dhe listën me emrat e të gjithë kandidatëve për kryetar bashkie dhe kopje të listës shumemërore të kandidatëve për këshillat bashkiakë, për ato bashki në të cilat procesi zgjedhor administrohet nga një KZAZ e vetme.

3. Formulari i vetëdeklarimit, duhet të plotësohet në mënyrë të qartë me kompjuter dhe të nënshkruhet në çdo fletë nga kandidati.”.

1.2 Në nenin 9, pas pikës 5, shtohet pika 5/1 me këtë përmbajtje:

“Komisioni Qendror i Zgjedhjeve, si rregull brenda 72 orëve nga dorëzimi i formularëve të vetëdeklarimit, evidenton rastet e refuzimit apo të mosparaqitjes së formularit të vetëdeklarimit. Refuzimi për të dorëzuar formularin e vetëdeklarimit ose mosparaqitja e formularit të vetëdeklarimit përbën shkak për mosregjistrimin e kandidatit në zgjedhje nga Komisioni Qendror i Zgjedhjeve. Vendimi për mosregjistrimin e kandidatit nga Komisioni Qendror i Zgjedhjeve, i njoftohet menjëherë, subjektit zgjedhor, Komitetit Nismëtar ose kandidatit të propozuar nga zgjedhësit. Në zgjedhjet për organet e qeverisjes vendore vendimi për mosregjistrimin e kandidatit i njoftohet menjëherë KZAZ-së që

administron e vetme zgjedhjet për një bashki, për vazhdimin e procedurave për regjistrimin e kandidatëve. Vendimi i Komisionit Qendror të Zgjedhjeve për mosregjistrim, në rastet e kandidatëve të propozuar nga subjektet zgjedhore, përmban dhe sqarimin për të drejtën e subjektit për zëvendësimin kandidaturës jo më vonë se 42 ditë para datës së zgjedhjeve”.

2. Ky udhëzim hyn në fuqi pas botimit në Fletoren Zyrtare.

3. Kundër këtij vendimi mund të bëhet ankim në Kolegjin Zgjedhor pranë Gjykatës së Apelit Tiranë, brenda 5 ditëve nga shpallja e tij.